



Laax, sguard vers il guaud da Flem e la Ruinaulta.



Il vitg da Falera cun la Muota e la baselgia da S. Remigi (a dretga).

DETLEF MENZEL / PIXELIO

# En las vischnancas da Laax e Falera

■ Il LIR fa staziun a Laax e Falera, las emprimas vischnancas situadas per propi «supra silvam», pia sur l'Uual Grond che sparta il Plaun da la Surselva. Qua cumenza er il circul da Glion (term politic/administrativ) respectivamain la Foppa (term geografic/topografic), la regiun che vegn preschentada en in artitgel da survista introductiv.

## Foppa

Regiun da Sagogn e Glion, circul Glion, district Surselva (avant il 2001 Glogn), tudestg Gruob. Il num sa referescha a la furma da la cuntrada (fop). Geograficamain designescha la Foppa l'entir territori che s'extenda dal guaud da Flem a Pitasch e fin a Sursaissa e Vuorz che fan part dal circul da Rueun. Politicamain appartegnevan – avant las fusiuns pli novas da Mundaun ed Ilanz/Glion – 17 vischnancas al circul da Glion, situadas a sanestra ed a dretga dal Rain Anterior. En il temp francon era la Foppa il center dal ministeri carolingic *Tuverasca* ed il territori d'urbanisaziun e d'economia il pli impurtant dals Zaccons/Victorids, cun curts centralas a Sagogn e Glion. En il temp autmedieval en sa furmads ina retscha da pitschens signuradis (Sagogn, Valendau, Castrisch, Montalt, Castelberg, Friberg, Frauenberg, Löwenberg) ch'èn per gronda part vegnids attribuids en il 13avel e 14avel tschientaner al domini dals Belmonts. Il 1371 en quels morts ora e la Foppa è passada als conts de Sax-Mesau, il 1483 a l'investgieu da Cuira. Il 1538 en ils cumins sa cumprads libers dals dretgs signurils. Intginas dretgiras pli pitschnas, sco quellas dals Libers da Lags e da Sevgein u quella da Schluen-Löwenberg, en sa mantegnidas fin a la helvetica. En il temp medieval tardiv possedeve l'investg da Cuira gronds bains e disponiva da numerus subdits en la Foppa. Sagogn (Aspermont/Fraissen) era il center da la giurisdicziun episcopala en Surselva (Müntinen). L'accent politic è sa spustà a la fin dal temp medieval da Sagogn a Glion, la tgina da la Lia dals signurs dal 1395 (ch'ha anticipà la Lia Grischa dal 1424). Glion è daventà en roda cun Cuira e Tavau in lieu da dieta da las Trais Lias. Suenten la reformaziun era la Foppa confessionalmain paritetica. Durant l'Affar da Sagogn dal 1701 en intginas vischnancas catolicas sa separadas temporarmain. Il 1731 è vegnì stampà en rumantsch l'urden da process civil e penal da la Foppa («Fuorma dilg dreig civil a criminal»), redigi da Jacob Casutt da Sagogn. Cun la creaziun dals novs cumins il 1851 en las dretgiras da Lags, Sevgein e Schluen vegnidas integradas en il circul da Glion che n'è betg pli sa midà territorialmain en fin il 2009 (vischnanca da Mundaun). Cun excepziun da las vischnancas tudestgas da Versomi e Valendau è la Foppa ina regiun rumantscha, ma cun ina maiorità tudestga a Glion.

Martin Bundi

## Lags (signuradi)

L'Urbari habsburgais (1303–07) menziunescha il *comitat* (contadi) respectivamain il signuradi da Lags. Il territori dal signuradi correspundeva quasi integralmain a quel da la veglia Rezia Sura. El cumpigliava la cuminanza dals Libers da la Val dal Rain Anterior e da la Val dal Rain da Cuira al sid da la Landquart che disponiva d'ina atgna dretgira ed era concentrada oravant tut en la Surselva, spezialmain a Lags e Sevgein. Ina da las duas dretgiras da la regiun aveva sia sedia a Cuira, l'autra, per tut ils Libers da sur il guaud da Flem, a Sessafret (oz Saissafretg u Sassfau) a la punt sur il Rain a Castrisch. Il chastellan habsburgais, al qual cumpetevan ils dretgs da giurisdicziun e la proteccziun da la fiera, residiva sin la fortezza da Cuolm Liung sper Lags. Questa fiera aveva lieu il di da S. Gagl sin il Prau Marcau al sid da Cuolm Liung a la via dal Lucmagn e vegniva frequentada tranter auter da commerziants da Ligiaun. A partir dal 1342 en ils Libers da Lags vegnids dads en pegn als conts von Werdenberg. Els han aderì a la Lia Grischa il 1395, en sa liberads dals von Werdenberg il 1428 ed en vegnids suttames, sco glied libra da la Chadè, a la proteccziun da l'investgieu da Cuira il 1434. En consequenza da cuntraversas internas en las gruppas da Lags e Sevgein sa separadas il 1518 da la communid giudiziala dals Libers da sur il guaud da Flem ed han constitui in cumin autonom; ils emprims status giudizials da Lags-Sevgein dateschan dal 1548. Il 1851 è il cumin vegnì attribui al circul da Glion.

Martin Bundi

## Laax (Lags)

Vischnanca politica, circul Glion, district Surselva (avant il 2001 Glogn). La vischnanca è situada sin ina pitschna terrassa cun dus lais sur l'Ual da Mulin sin la spunda nord da la Val dal Rain Anterior e cumpiglia las fracziuns da Salums, Cons, Uletsch, Staderas e Murschetg. 1290/98 *Lages*, tudestg Laax (uffizial). 1850 277 abitants; 1900 280; 1950 328; 1970 480; 2000 1150. Craps-scalutta megalitics a Crap Fraissen attestesch ina preschientescha umana da l'epoca preistorica. In veritabel abitadi era dentant sa constitui pir en il temp autmedieval tras runcadas effectuadas da purs libers da lingua rumantscha sin pastgira comunabla da Sagogn. Da derivanza pli veglia che Lags eran ils edificis a Lavanuz, menziunads l'onn 765, cun champs cultivads e prads sauads.

Enturn il 1300 furmava Lags, cun la fortezza da Cuolm Liung ed il lieu da fiera Marcau, in center dal signuradi da Lags e da la communid dals Libers da sur il guaud da Flem. I n'è dentant betg enconuscent, sche tut ils abitants da Lags han appartegnì a questa communid. Sin plaun ecclesiastic ha Lags fatg part fin il 1525 da la pravenda da Sagogn, dapi il 1309 sco chaplania autonoma.

ma. Ils patrums-baselgia s. Otmar e s. Gagl cumprovan l'origin tardiv da l'abitadi. Enturn il 1500 en vegnidas construidas trais chapluttas: quella da s. Giachen a la via veglia per Sagogn, quella da s. Bistgaun a la via veglia per Glion e quella da s. Clau a la via per Flem. Il process da separaziun da la vischnanca da Lags, da las alps e dad auters bains alpesters da la cuminanza economica cun Sagogn, inizià en il 15avel tschientaner, è vegnì concludì pir en il 19avel tschientaner. Ina versiun tudestga dals status communals datescha dal 1645, in'autra en lingua rumantscha dal 19avel tschientaner. Tranter il 1654 ed il 1732 han gi lieu plirs process da strias. Las famiglias dominantas a Lags en il 16avel–19avel tschientaner en stad as Jochbergs, Montaltas, Corays e Toggenburgs residents en chasas patrizianas, per exempel la Casa Liunga (1609). En il 19avel tschientaner en vegnids fundads divers manaschis artisanals: in mulin ed ina regia a l'Ual da Mulin, ina cuntscharia e duas tenscharias a la riva dal Lag Grond (ina pressa da tailla è conservada en il Museum retic a Cuira), ina fravgia en vischnanca sco era chavas e furns da chaltchina (*caltgeras*, menziunà il 1550) en ils conturns.

Il svilup da Lags ad in lieu da cura climatic ha cumenzà a la fin dal 19avel tschientaner cun l'avertura da l'emprim hotel, il Seehof (1880, cun stabiliment da bogn) e d'in edificij per colonias da vacanza. Il grond boom turistic ha inizià en ils onns 1960–70: las telefericas dal Crap S. Gion (oz Weisse Arena Bergbahnen AG) en vegnidas amplifitgadas successivamain e las muntognas da Nagens e dal glatscher dal Vorab avertas sco territoris da skis (da stad). Ultra da quai han ins promovì in'activitad intensiva en il sectur da construcziun (hotels, chasas d'appartaments, parahotellaria) ch'ha schendrà entirs quartiers da vacanza a Cons, Marcau, Uletsch e Murschetg. Quest svilup ha effectuà in ferm chal dal sectur primar (il 2000 existivan mo anc sis manaschis purils a Lags), in augment excessiv dals pretschs da terren ed immissiuns considerablas tras il traffic motorisà. Il 2005 lavuravan radund 86 % da la populaziun cun activitad da gudogn a Lags en il sectur terziar. La Fundaziun Pro Laax, constituida il 1974, promova la creaziun artistica, las tradiziuns, il sport e surtut era il rumantsch. Meglieraziun generala concludida il 2000; dapi alura dispona Lags era d'in museum local. Part da la populaziun da lingua rumantscha: 1941 91%; 1980 51% (lingua materna); 2000 40,1% / 56,2% (megla lingua / tuttas indicaziuns).

Martin Bundi

## Nagens

Alp situada a 1970 m sin il territori istoric da Lags. Attestada per l'emprima giada l'onn 765 en il Testament da Tello

in alpe *Agise onera centum*, rumantsch sin l'Alp Nagens ina racolta da fain da 100 chargias. L'areal, utilisà durant il temp medieval tempriv oravant tut sco prada, è sa transformà en il temp medieval tardiv ad ina regiun d'alps. Il num Nagens valeva oriundamain per l'entir territori da Sur Crap e s'extendeva a l'ost da Platt'Alva fin al glatscher dal Vorab ed al vest fin a la Fuorcla da Sagogn. En il 14avel e 15avel tschientaner ha disponì la claustra da Mustér mo pli d'ina part da l'antier possess victorid, per exempel da l'Alp S. Martin (1986 m); il rest era in possess dals baruns de Razén, da purs libers e da vischinadis. La regiun consista actualmain da trais alps separadas ina da l'autra tras mirs da crap: l'Alp Nagens a l'ost appartegna a la vischnanca da Lags, l'Alp Mughels (1998 m) entamez a la corporaziun da Schluen e l'Alp S. Martin al vest a la vischnanca da Sagogn. L'areal cumpiglia in'entira rait da telefericas e furma la part centrala da la regiun das skis numnada Arena Alva.

Martin Bundi

## Vorab

Muntogna marcanta cun glatscher, situada a 3028 m al nordvest da Flem al cunfin tranter ils chantuns Grischun e Glaruna. 600 m pli al nord sa chatta il Vorab glarunais (3018 m). Il Vorab ha obtegnì ses num dals Glarunais, dal punct da vista dals quals la muntogna stat «vor» ed «ab». L'emprima ascensiun descritta dal Vorab datescha dals 28 da fanadur 1872 ed è vegnida interprendida da Walter Senn e Heinrich Elmer da Dialma, commembers da la sezziun Tödi dal Club alpin svizzer. Dapi ils onns 1970 è il glatscher dal Vorab avert al sport da skis (Pendicularas Crap Sogn Gion SA). Dal Crap Masegn mainan ina teleferica al pe dal glatscher dal Vorab e runals sin il spitg.

Martin Bundi

## Falera

Vischnanca politica, circul Glion, district Surselva (avant il 2001 Glogn), situada a 1218 m sin ina terrassa da la vart sanestra dal Rain Anterior. 765 *Falariae*, tudestg Fellers (fin il 1943). 1850 415 abitants; 1900 322; 1930 289; 1950 370; 1970 309; 2000 504. A Muota, al sidvest da la terrassa, han ins scuvert ina part d'ina culegna dal temp da bronz. Ils chats ils pli impurtants en trais objects da bronz: ina guglia a rudella da 80 cm lunghezza (ca. 1600 a.C.) e duas farclas. Dal temp da fier en attestads singuls chats (800–400 a.C.). Las retschas da megalits al sid da la Muota en probablmain relicts d'in center preistoric dal cult dal sulegl. A l'ur da la chavorgia da Schluen sa chattava il chastè dals signurs de Chischlatsch. Suenten il 1319 è quel passà als conts de Werdenberg-Heiligenberg, il 1408 als Rinks. Il 1538 ha Falera cumprà ora ils dretgs feudals episcopals. La reformaziun aveva fitgà pe a Falera, ella n'ha dentant betg pudì

sa far valair a la lunga. Il 1701 è la vischnanca da Falera sa participada da la vart catolica a l'Affar da Sagogn ed è vegnida chastiada perquai dal cussegl da guerra reformà. Sin il territori da l'antieriura culegna dal temp da bronz sa chatta la baselgia parochiala da S. Remigi, menziunada il 831. Il 1491 è l'edificij actual vegnì consecrà ed incorporà en l'abazia da Mustér. En il decurs dal 17avel tschientaner è la collatura passada a la vischnanca. Dapi la construcziun da la nova baselgia parochiala (1903–04) vegn S. Remigi duvrà mo pli per occurrenzas spezialas. L'edificij è sut la proteccziun da monuments. Sut l'influenza da Lags e Flem è il vitg puril rumantsch (2000 57,1% / megla lingua, 78,0% / tuttas indicaziuns) sa transformà suenter il 1965 ad in lieu turistic cun access a la regiun da skis da l'Arena Alva. L'antier center puril vegn circumdà oz da numerus abitaziuns da vacanza e d'hotels (1989 ca. 60% da las pernottaziuns en la parahotellaria). Meglieraziun generala 1982–99. Il 1992 ha la vischnanca decidì da limitar la construcziun d'abitaziuns secundaras. Il 2000 eran 40% dals occupads a Falera pendularis dal lieu. Il 2005 lavuravan 50% en il terz, 21% en l'emprim sectur. L'onn 2003 è vegnì avert il center da cultura La Fermata ed il 2007 il center d'astronomia Mirasteilas.

Adolf Collenberg

## Chischlatsch

Ruina da chastè situada sin territori da la vischnanca da Falera a l'ur da la Val da Schluen, tudestg Wildenberg. Areal lunghent che s'extenda sin duas collinas, separà tras in foss. Da Chischlatsch en sa mantegnids sulettamain restanzas da la miraglia ed il foss da tschinta. Il chastè sez na vegn mai menziunà, ils de Wildenberg percenter en attestads il 1252 sco Libers nobels da la Surselva, descendents da la medema lingua u d'ina lingua parentada cun ils signurs de Frauenberg, Greifenstein e Sagogn. Grond possess a Falera, a Vuorz ed en l'Engiadina (Wildenberg-Zernez). Enturn il 1302 è mort l'ultim descendent masculin dals Wildenbergs sursilvans. Lur possess è passà tras Anna de Wildenberg als de Werdenberg-Heiligenberg. Il chastè (gia en muschna?) era en il 16avel tschientaner en possess d'ina lingua laterala dals Zollern.

Adolf Collenberg

## Lexicon Istoric Retic

Il LIR cumpiglia bundant 3100 artitgels (geografics, tematics, artitgels da famiglias e biografias) davart l'istorgia grischuna/retica e la Rumantschia. Editura: Fundaziun Lexicon Istoric Svizzer; versiun online: [www.e-lir.ch](http://www.e-lir.ch); versiun stampada: [www.casanova.ch](http://www.casanova.ch) u en mintga libreria.